

四庫全書

史部

欽定四庫全書

史部

端肅奏議卷

八至
十二

詳校官侍講學士臣法式善

編修臣裴謙覆勘

總校官知縣臣楊懋珩

校對官庶吉士臣吳裕德

謄錄監生臣沈瑞錦

欽定四庫全書

端肅奏議卷八

明 馬文升 撰

陳情乞恩罷歸由里以弭天變事

照得弘治十一年十月十一日夜清寧宮災烟焰障天
其勢甚大此非常之變異也仰惟皇上嗣登寶位以來
敬天法祖勵政勤民聲色之不邇貨利之不殖無一事
而不合乎正道無一政而不恤乎軍民雖古堯舜之君

天下亦不過此宜乎和氣召祥災異罔見然而近年各處奏報天鳴地震等災異歲無空月今皇城之內猶有此災變驚及九廟悸速重幃此固上天仁愛皇上示此儆戒欲皇上側身修行以保億萬年無疆之洪圖實亦由臣叨任保傅濫居高書職掌兵政係國安危學術疎寡德望淺薄不能陳善閉邪以匡輔聖明奉宣德意以康濟天下所致且古者國有大災人君固當修省必策免不職大臣以應天變臣竇居大臣之列况年踰七十

精神衰憊不能任事竊祿瘵曠宜在所免伏望皇上痛
思致災之由重加修省之誠先將臣罷歸田里另選賢
能以充厥任庶天意可回而災變可彌矣臣不勝戰慄
恐懼俟命之至為此具本親齋謹具奏聞伏候勅旨引
治十一年十月日奏

懇乞天恩容令休致以保晚節事

照得臣先因年滿七十累乞休致俱未蒙俞允頃因星
變復欲上請歸田以應災咎但念清寧宮工役未及告

成又值邊方多警奏報填委未敢遽陳緣臣今年七十有四聰明日減精力日耗強持衰憊之體久忝密勿之班尚寬汰斥有妨賢路乞放歸田里以終餘年等因具本奏奉聖旨卿宿望老臣方隆委任豈可遽求休致宜盡心職務不允所辭欽此欽遵臣伏覩綸音仰荷聖明圖任舊臣弗忍棄去臣不勝感激雖隕首糜軀無以為報但七十致仕國典具載臣之叨冒已踰四年思罄報國之忠遂失進退之宜處事乖方致來物議况兵部職

掌戎務係國安危臣衰老才識昏庸加以近來疝疾舉發痰喘壅盛委的不堪任重伏望皇上俯徇愚悃容令致仕全臣晚節不勝感戴天恩之至為此具本親齋謹具奏聞伏候勅旨弘治十二年十月初六日奏

復乞天恩憐憫衰疾容令休致以全晚節事

臣近以居官四十九年年已七十有四不能任事有招清議乞放歸田里以終餘年等因節該奉聖旨卿宿望老臣方隆委任豈可遽求休致宜盡心職務不允所辭

欽此欽遵又該臣奏委的衰老有疾久妨賢路乞容致仕以全晚節等因該奉聖旨朕以卿耆德舊臣已有旨勅留宜安心供職毋再固辭欽此欽遵臣以兵部係軍政衙門邊報并常行公事繁冗日逐題奏事件用印臣有疾不能朝參已將原掌印信咨送本部定奪該本部題奉聖旨印還着馬文升掌欽此欽遵又該臣奏宿疾舉發一時調理未痊恐致有悞部事所據印信乞命本部佐貳官暫且掌管候臣病痊之日另行具奏定奪等

因節該聖旨卿有疾暫免朝參在部用心辦事印信照
舊掌管欽此欽遵臣伏覩節奉綸音不勝感激雖粉骨
糜軀無以為報切思盡忠報國人臣事君之大本進禮
退義仕者始終之全節况七十致仕令典攸存臣年滿
七十以來累上封章懇乞休致俱未蒙俞允茲復陳情
乞歸田里再荷勉留兩辭印信又蒙暫勉朝參在部辦
事此皆皇上天地委曲覆冒之恩不遺枯朽之意也伏
念臣本庸材荷蒙列聖洪恩官叨保傅職掌兵戎幸逢

皇上備堯舜之德撫盈成之運臣過蒙委任所以寢食弗遑職掌之外累上封章期德澤流布威武奮揚內安黎庶外攝四夷少輔雍熙之治仰酬知遇之隆此臣之愚忠素志天地鬼神之所共鑒者也豈敢輕棄祿秩甘就閒散而辜皇上之恩但臣委的衰老加以疝疾舉發艱於步履非醫藥所能治療一時不能赴部本部邦政所司係國安危臣如仰遵成命勉強支持倘誤國事關係非輕微臣始終之節罪責之加亦何惜哉是以昧死

懇陳伏望皇上憐臣衰老有疾曾效犬馬微勞照例容臣致仕得以生還田里少延殘喘數年臣舉家不勝感戴天恩之至為此具本令家人馬浩親齎謹具奏聞伏候勅旨弘治十二年十月二十八日奏

賞勞官軍激勵銳氣事

照得大同宣府延綏三鎮軍士數年以來遊奇兵大同者常往延綏策應隔涉黃河數百餘里宣府者亦往大同應援延綏却來大同截殺少則一二月多則三四月

馬匹倒死隨要追陪及各鎮城堡見在操守馬步官軍俱係聽調按伏防禦殺賊之數馬軍常出朋合買馬銀兩委的十分艱難加以邊地苦寒誠為可憫自弘治元年荷蒙朝廷溥賞銀兩弘治十年又蒙欽賞遊奇官軍之後至今數年未沾恩澤今大寇近邊勢甚猖獗軍威挫損士氣消沮正係激勵人心奮勇効力之秋伏望皇上重念邊軍艱苦斷自宸衷將三鎮操備防守馬步官軍并偏頭關遊兵每員名量賞官銀若干兩其三鎮遠

調出征遊奇二兵勞苦尤甚亦合量為加賞以濟困敝
則彼心感恩思報而奮勇克敵矣但此等恩典出自朝
廷非臣等所敢擅擬伏乞聖明裁處緣係乞賞邊軍以
激勵銳氣事理未敢擅便謹題請旨弘治十三年四月
二十五日題

成造堅利甲兵以防邊患事

照得克敵制勝固在乎官軍之奮勇尤在乎甲兵之堅
利甲不堅則不能以遮矢石兵不利則不能以挫賊鋒

故古人云甲不堅是以其卒與敵也蓋言不以人命為重而喪於敵矣然則有天下國家而欲盛武備以捍禦強敵者其甲兵豈可以不堅利也哉本部向因天下衛所年例成造軍器有名無實徒費錢糧俱不堪用已經奏准行移內府兵仗局成造盔甲腰刀斬馬大刀長牌弓箭等項發去浙江等都司團局照樣成造已有解到之數俱為可用今看得凡京營官軍每遇出征止關與軍器局所造盔甲其甲中不掩心下不遮臍袖口太寬

又多壓肩不掩心則不能遮矢袖寬壓肩則不能開弓
且重二十四五斤而甲葉不堅軍士豈能披之而益尤
平常甲面布多藍色不以盛軍容而振軍威臨敵誠為
誤事況今邊方多事正係繕甲利兵之日臣文升任南
京兵部尚書叅贊機務之時南京軍器局所造軍器每
年內外守備叅贊官員親詣本局試驗其甲頗堅甲面
布色亦青但甲亦重二十斤以上袖亦壓肩不知前項
軍器置之何用即今京庫闕少盔甲如蒙乞勅兵仗局

成造上樣盔甲各二頂副腰刀二把其甲重十八斤盔
二斤半發與兩京軍器局令管局內外官員照樣成造
務將甲葉冷端數百錘使之十分堅固擲地有聲方為
得法甲面務要青布用火漆釘釘之若用線穿者其線
亦要精緻而盔要低矮不宜太高亦須端到自不生鏽
在京軍器局所造軍器合亦照南京事例團營提督內
外官并工部堂上官每年公同給事中御史試驗一次
如有不如式者令其依式成造其給事中御史仍照舊

例按季試驗若有成造不如法者許其具奏罪坐管工
官員仍行南京工部查勘南京軍器局所造軍器各有
若干具數作急回奏應否行取前來備用工部徑自具
奏定奪臣等職掌兵戎亦司軍器况官軍戰陣勝負係
乎甲兵堅利何如故敢僭陳伏乞聖明留意俯賜施行
臣等不勝幸甚緣係照樣成造堅利甲兵以防邊患事
理未敢擅便謹題請旨弘治十三年五月十一日題
乞恩憐憫衰老容令休致事

近該本部咨該准禮部咨為星變事近聞欽天監奏有
彗星之異中外臣民皆相傳駭况雲南地震之變尤異
尋常即今邊方告警敵情叵測天時人事實切憂思是
皆文武大小官員不能仰承德意勉修職業致此變異
乞勅內外臣工勉圖修省等因備由轉行到臣除痛加
修省及時禦敵安邊合行事宜節次具奏外又准吏部
咨兩京六部等衙門堂上官俱係大臣中間衰疾未副
人望者行令各官自陳等因前來照得臣成化二十二

年任兵部尚書未幾改南京兵部叅贊機務成化二十三年十一月欽蒙聖恩改臣都察院左都御史弘治元年七月內欽命臣同太監傅恭李良保國公朱永襄城伯李瑾提督團營操練軍馬弘治二年二月內復蒙改臣兵部尚書尋加太子少保復陞太子太保又陞少保兼太子太傅切念臣本庸材荷蒙列聖天地覆載之恩歷官五十年恭事皇上一十三載自愧德薄才踈夙夜在公罔敢怠忽勞心焦思寢食弗遑期效涓埃之報少

酬知遇之恩仰惟皇上堯舜之聖禹湯之仁宜乎兩儀
奠位五辰順序夫何玄象示警坤道未寧敵寇跳梁於
邊陸盜賊充斥於荆楚此固上天仁愛皇上之恩實由
臣官居保傅職掌兵戎不能論道以變理陰陽盡心而
修舉邦政致召前項災變罪莫能逭當茲邊方多事之
秋固非臣敢求退之日但古者凡遇災變必策免大臣
以回天意臣實居大臣之列宜先罷去况臣犬馬之年
七十有五前此八上封章懇乞歸田俱未蒙俞允今臣

步履雖若強健而精神實為內衰兼素有脾胃疝氣之疾飲食不多近日勞心稍過輒生暈眩須少寢片時方得蘇息臣每思之歷官年久賦性愚直見惡於人者衆今衰老之年才力有限恐處分乖宜有誤國家大事萬死何贖伏望皇上憫臣衰老曾效犬馬微勞容臣致仕保全始終別選賢能以代其任臣不勝感戴天恩之至為此具本親齋謹具奏聞伏候勅旨弘治十三年五月

十五日奏

釐正選法事

檢照我朝所定諸司職掌吏部文選清吏司所掌首開
選官一作闕凡內外官員考滿侍親致仕丁憂殘疾考
功司勲來付案呈本部立案作闕類寫闕本赴內詮註
一類選凡考功付到考滿官司勲付到起復官及內外
衙門送到降用裁減截替別用官員就憑來文附簿立
案案呈本部審實相同比例無差就便謄錄選本引選
又聞進士監生通經秀才人材孝廉賢良方正等項俱憑

來文附簿責供年籍住址出身名色引奏選用大意謂凡內外衙門將事故官員開闕到部明白立案作闕然後照闕行取各衙門該選進士監生人等并九年考滿及三考冠帶聽選官員考驗停當分成等第一具開闕本一具選本引奏選用蒙朝廷照闕逐項用選官印子某人至某人某官以合原闕之數用選官印子即朝廷欽選也候用印子已定本部遵奉欽定職銜照闕除授在內者就令到任在外者給憑到任選法始終大意如

此職掌開載甚明萬世所當遵守今在京大小官員及在外方面知府等官有闕俱據闕推舉相應官員隨即具奏銓補准大選在內或闕主事評事司務行人等官在外或闕知州通判推官知縣等官或三四百闕或五六百闕不知始自何年行取該選人等查考停當止具選本不具闕本引奏選用若無闕本朝廷憑何銓選某人為某官該若干員且選法首開作闕蓋有闕則補官若選官不具闕本殊與職掌所載選法不合臣等再三

思維實為闕典若不具奏釐正誠恐因襲年久選法愈致廢弛猝難興舉所係非細合無今後凡遇大選先令該司官於闕內密切查算內外各衙門開到大小員闕共若干然後照例挨次取辦事進士聽選監生并九年考滿該陞該降及三考冠帶聽選官應考試者照例考試分成等第臨選之時照依職掌一具闕本一具選本其闕本止開總數通行連人引奏選用候用印子已定臣等於午門外選官房內共同吏科都給事中遵奉欽

定職銜照依闕帖填註相應衙門其餘掛榜抄選等項
照舊施行庶選法舊規不致廢墜歷年習弊得以清除
而將來有所持循矣緣係釐正選法事理未敢擅便謹
題請旨

再乞天恩容令休致以避賢路事

臣昨以年今七十有五夏初北敵入攻大同勢甚猖獗
臣以籌畫邊務調度軍馬時值盛暑勞心太過以致眼
目昏花精神衰憊委的年老不能任事乞容休致等因

具奏節該奉聖旨御宿望老臣熟諳兵政委任方隆豈
可引年屢求休致所辭不允欽此欽遵臣伏覩綸音益
切感激仰惟皇上聰明英武睿知仁慈踐祚以來任賢
不貳如臣庸愚亦蒙委任俾典兵戎且加重職此誠千
百載之一遇也故臣之圖報寢食不遑妻孥莫顧誓竭
報國之忠期輔堯舜之治以身徇國死而後已因年踰
致仕之期前此累乞休致俱未蒙俞允今復懇乞歸田
重荷勉強留此皆天地委曲覆冒之恩也臣益當勉罄疲

駑以圖報稱但臣委的年耄志衰弗克濟事雖聖主之恩不忍棄去而在臣之勢自不敢留若再列班行必重招物議縱容立朝心實忸怩亦不能展布四體以辦政務或又加臣以貪祿固寵不知止足則臣之晚節終不能保伏望皇上憫臣衰老察臣愚衷早放致仕以避賢路或削去官秩罷歸田里少延殘喘以終餘年臣不勝感戴天恩之至為此具本親齋謹具奏聞伏候勅旨弘治

十三年十月二十二日奏

次三司官

圖

瑞齋奏議

十四

端肅奏議卷八

欽定四庫全書

端肅奏議卷九

明 馬文升 撰

處置銀兩以濟邊餉事

照得近年因北敵小王子人馬數萬往牧河套犯我邊陲朝廷軫念地方重恤生靈命將出師往彼征剿主客軍馬五萬之上日費糧料草束不止千金但以陝西人民自成化二十二年大遭飢荒死亡過半加以去歲延

慶二府旱災無收各邊糧素無積蓄欽差總督邊儲大臣誠恐邊餉不敷設法分派腹裏人民轉運訪得每糧石除本色外用腳價銀二三兩每草一束除本色外用腳價銀一錢二三分方得轉運到邊里無空戶戶無閒丁懼怕殺虜逃亡者衆此外無計可施累次具奏有欲軍民上納銀兩授以武職者有欲生員納銀許其入監者有欲僧道納銀給以度牒者有欲吏典納銀免其京考者各衙門恐傷治體多不允從戶部或開中鹽引茶課或

行取皂隸銀兩東那西轆方得六十萬兩之數又於河南預備秋夏稅糧本色一十七萬石以每石用銀二三兩計之須得銀五十萬兩每兩須賣穀麥二十石而民何以堪今陝西一方用兵未及半年之餘本色之外用銀已該前數况遼東女直合謀侵犯未見寧息而湖廣貴州見今相繼用兵近聞南北直隸河南山東有大水蟲蝗之災秋無所收春來小民缺食嗷嗷待哺必須賑濟有司倉廩空虛帑藏銀兩不多不知將何以處置耶

仰惟我太祖高皇帝平定天下之初經制國賦論田定
稅驗畝徵糧天下相同今該各布政司并直隸府州縣
折糧價銀多有不一有每石折銀二錢五分者有折銀
一兩用價八九錢者少亦六七錢者草每束有折銀三
分者有上納用銀六七分或四五分者除官錢并加倍
糧數及廣西雲貴外不為常例權時之宜自弘治十四
年為始每糧一石暫增銀二錢每草一束暫增銀二分
則數十萬兩之銀可立而得况出自地畝分所當然比

之每石折銀一兩者不及其半用價三兩者霄壤不侔
既不係橫徵重斂亦不係額外濫收衆輕易舉民亦樂
從候邊方寧靜照舊折納不猶愈於前項賣官鬻爵等
項事例有虧治體而見輕外夷乎急濟邊餉計無出此
伏望皇上念邊務之方殷思軍餉之不足斷自宸衷勅
下戶部早為查處毋惑羣議必於施行凡百官員不許
阻撓臣叨任大臣職掌兵政恨河套敵寇未曾殄滅憫
陝西人民供運疲困恐生意外之虞寢食不遑日夜思

維不避怨謗而建此生財助邊之議更乞聖明留意邊方生靈不勝幸甚為此具本親齋謹題請旨

地震非常事

查得近該巡按陝西監察御史燕忠奏稱據西安并長安等縣申稱弘治十四年正月初一日申時分忽然地震有聲從東北起響向西南而去動搖軍民房屋本日酉時分復響有聲如前至次日寅時又響如前及據本府朝邑縣申本年正月初一日并初二日寅時地震聲

響如雷自西南起將本縣城樓堞口并各衙門倉監等房及概縣軍民房屋震搖倒塌共五千四百八十五間壓死大小男女一百七十名口壓傷九十四名口壓死頭畜三百九十一頭隻及縣東北正東東南地方安昌八里一十九處遍地竅眼湧出水深淺不等汎流震開裂縫長約一二丈者四五丈者湧出溢流良久方止蔡家堡嚴伯村等四處湧出幾流成河不時動搖自本日起至十五日尚震未息人民驚惶四散逃避高阜去處

搭庵存住等因隨據延安慶陽二府及直隸潼關等衛
各申稱所屬州縣與前長安等縣日時地震聲勢相同
具奏該禮部抄出又訪河南河南府靈寶等縣亦各地
震如前臣惟地乃靜物止而不動動則失其常也考之
古典地震乃臣不承於君外敵不承於中國之兆歷代
固有地震未有震於正月朔日者亦未有震開而裂水
出將成河者此乃非常之異古今所未多見者也况朝
邑縣南近華嶽東連黃河而潼關之山實與華嶽相連

潼關朝邑地震如此之甚則華嶽黃河必為之震溢矣
且兆不虛示必有其應况陝西乃關中重地四鄰番寇
而延慶二府又與河套密邇正月朔日地震而敵人十
五日擁衆入寇榆林外敵侵陵中國之兆亦已明矣臣
聞此大異驚愕莫知所措除痛加修省外照得即今北
敵小王子部落日衆精兵數萬其酋首火篩者梟雄桀
黠往往以詐計敗我官軍近來入寇少散搶掠專一攻
圍城堡燒毀草束而用兵且精亦有號令觀其所存其

志非小若不使之大遭挫敗遠遁陰山或自相讐殺部落離散年復一年得我厚利獲我兵甲以彼之馬力藉我之技巧恐終為中國之大患也仰惟陛下宵旰憂勞勵精圖治雖古帝王亦不過是宜其兩儀奠位四夷賓服今陝西地震如此其異非常是皆天心仁愛陛下故示此以警告之欲其早為修省而保鴻圖於億萬斯年也今海內民困財竭兵衰將懦紀綱未大振法令未大行文恬武嬉奢靡成風敵寇猖獗人心渙散此正安內

攘外之時修德弭災之日伏望陛下祇畏變異修省尅責行仁政以安養斯民重臺諫以廣言路府庫之金帛重為撙節以備緊急之用無益之齋醮暫免修設以省浪費之繁念錢糧之空虛止傳奉無例之官憫畿民之艱窘禁奏討有礙之地遵聖祖之訓每清晨視朝法列聖之規日奏事二次今敵住河套正在用兵之際乞將陝西織造絨毯內官早取回京以蘇一方軍民之困存其餘力以備三邊飛輓之急仍乞勅翰林院撰寫祭文

禮部奏請差官齋捧香帛前去陝西致祭西嶽華山西鎮吳山之神更乞勅陝西巡撫都御史將被震倒塌房屋及壓死壓傷軍民之家每門量給銀若干兩以為賑恤埋葬之資及將所屬一應不急之務俱暫停止凡百安緝之方悉從舉行猶須操練軍馬修理城池務使地方寧靜軍民獲安內治既修則外患不足畏矣臣荷國厚恩五十餘年官居保傅職掌兵戎國家安危實同休戚觀茲變異無任憂惶伏望陛下察臣愚衷憫臣勞

瘁前項所陳一一俯賜施行則臣安享厚祿不為覲顏而陛下言聽計從亦不虛負累次勉留溫切之詔矣宗社幸甚生靈幸甚為此具本親齋謹題請旨弘治十四年二月十八日具題

傳奉事

切惟國家之患莫大於天災天災之重莫先於荒旱蓋荒旱則田無所收而民必至於缺其食食缺則命不可保而必至於為盜盜賊蠡起而禍患所由作矣自古君天下

者莫不為憂而所以致此者豈無自而然哉仰惟皇上
稟上聖之資居天位之尊大孝隆於兩宮仁恩溥於四
海聲色之不邇貨利之不殖任賢去佞從正抑邪無一
令之不臧雖古帝王亦不過是宜其海嶽效靈而雨暘
時若三辰順序而百穀用成夫何去歲浙江温台寧紹
江南直隸太平寧國及應天府所屬江北直隸鳳廬淮
揚滁和等府州夏秋不雨田禾無收百姓缺食逃移流
亡餓殍盈途荷蒙皇上勅命憲臣及巡撫都御史巡按

御史并南京守備等官大加賑濟但生齒至繁錢糧有限所活者固多而餓死者尤衆豈期今歲鳳廬淮揚滁和等府州并順天北直隸大名等府河南山東二布政司所屬州縣自春至夏仍復不雨麥多枯槁穀未播種人心惶惶亦無所望况漕運京儲尚未過淮此大有可憂之時也凡此皆臣等叨任大臣復竊厚祿不能變理陰陽寅亮天地宣布德澤以惠養黎元減省徭役以滋培邦本所致亦由在京內外衙門官員中間或有恣肆

貪婪無所忌憚在外三司等官亦多縱惡容奸不行禁治所以軍民受害積怨於中上干和氣致有旱熯之災臣等又不倫預為建明至厯聖慮特降綸音不勝惶汗除內府各衙門弊政已蒙欽降聖旨榜文禁約外而在外衙門積弊亦不可不革革弊貴有其要得其要則弊不革而自無矣其要惟在於振紀綱嚴法度而已此時紀綱漸弛法度少寬內外衙門弊政之多實由於此誠如皇上斷自宸衷俯賜施行更乞推此心以施之庶政

凡百司官員有犯者無分內外無間疏戚悉置於法無少假貸執此之政堅如金石行此之令信如四時如此則紀綱振法度行貪殘知懼而弊政自無宗社億萬無疆之休端在此矣臣干冒天威不勝戰慄懇悃之至緣係應詔革弊事理未敢擅便開坐謹題請旨

計開

一戒百官以修庶政

洪維我朝稽古建官內設五府六部都察院等衙門各

統屬官以分理庶務外設都布按三司各率其屬以安
養軍民上下相維體統不紊雖唐虞三代亦不過是國
初法令嚴明官知警畏敢有犯者重則置之典刑輕則
流竄革職以故官無輕犯犯無輕貸所以庶績咸熙而
萬姓樂業未聞有所謂弊政者矣自正統年間以後每
遇災異朝廷必降勅切責修省咸知警畏近年以來在
內官員守法奉公而盡心所職者固有聽囑納賄而任
情行事者亦多或競華侈於輿馬衣服之間或誇美麗

於居室妻妾之奉上下因循職業不修法日以弛而政日以弊在外大小官員或極力以奉承權要或恣意以剝削軍民科罰以遂其私淫刑以逞其暴巡按等官亦多姑息旌異廉能之奏月無虛日參奏貪酷之官歲或一見以致困窮無告冤抑莫伸政愈苛而民愈殘皆足以上干天和召災致變誠非細故庶官之賢否係生民之休戚若非官得其人弊政何由而革治道何由而隆災變何由而弭乎伏望皇上降勅兩京府部等衙門并

巡撫巡按都布按三司官各要正己正物為國為民嚴
戒所屬恪遵國憲各修其職務令謹其操持俾弊端悉
革而物議少息上體朝廷圖治之心下解生民倒懸之
苦庶幾官得其人政得其理和氣日臻而災沴自消矣
一公勸懲以別淑慝

臣聞唐虞之法三載考績三考黜陟幽明歷代遵行莫
之或易我朝法古為治叅酌時宜凡內外大小官員俱
以三年為一考在內先從本衙門堂上官考覈咨送本

部定其稱否在外從本府并布按二司官考覈各出考語三考各赴部給由定其黜陟在外方面府州縣官再遇朝覲之年本部憑巡撫巡按布按二司揭帖考語黜其不職官頗知懼其兩京堂上官例不考覈凡遇災變科道官必指名劾奏請議凜然但五品以下官員名位未崇不在糾劾之列止是五年一次本部同各衙門堂上官考察但年期尚遠各官雖有不職者亦或遷轉而去以此漏網者多及至給由各該堂上官考覈詞語又多溢美中間清

譽無聞物論不與者亦不開平常不稱職等項勸懲之典
又或未公在外巡撫巡按按察方面等官責任非輕近年
皆尚和同風紀欠振以致貪虐滋甚有壞事殃民跡狀敗
露為言官所劾者往往付之查勘所以各官肆無忌憚患
失之心一生固位之謀百出此弊政之大者也今後在內
屬官果有貪淫不謹實跡昭然人所共知從本衙門堂上
官指名舉奏以憑罷黜其在外大小官員有的為民害
賦虐顯露者許巡撫巡按官挈問如律前項內外官員

尚有知之未盡而漏舉者本部訪有的實事情奏請定奪廢幾勸懲以公淑慝以別政無不清而弊無不革矣
一清傳奉以節冗費

先准兵部咨為救荒弭盜以安地方事該本部會官計議題奉聖旨各處地方灾傷重大民生困苦朕甚憫惻卿等所言深切時弊事當行的還查議明白開具來說欽此欽遵查議間今奉勅旨臣等切惟人君之大柄莫先於惜名器國家之首務莫急於節財用蓋名器不惜則官必至於

冗濫支費無窮而財用有不足矣君天下者豈可輕之而不重者哉仰惟太祖高皇帝奄有天下之初稽古建官各有定員非効勞任事者額外未嘗輕授一官彼時事無不立而政無不修所以府庫之財用有餘雖遇兵荒未嘗告乏列聖相承咸率是道未聞有傳奉之官至成化年間始開傳奉之門而冗官為之漸多十六年因遇星變廷臣論奏奉憲宗皇帝聖旨傳奉文職大小官員除勲戚功陞蔭授祿用不動外其餘及儒士都寄名放回有關取用內有

為事妄冒并乞恩陞授的查來定奪各衙門匠官精通
藝業的存留着支半俸欽此欽遵綸音一下中外歡欣
鼓舞咸以為雖漢武輪臺之詔亦不能過但當時傳陞
官員尚有退之未盡者恭遇皇上嗣登寶位之初俯從
言官之請但係傳奉官員盡行裁退天下欣然稱頌仁
明奈何近年以來大小官員傳奉者復多其他亦有白
衣人送中書處食糧習字出身得授中書舍人者前項
傳陞等官一年該支俸糧動至數萬石皂隸銀不止萬

餘兩况今親藩已至三十餘府而郡王將軍中尉郡主
郡君縣君儀賓等項不下千數所用祿糧通該百萬石
有餘而兩京軍職比之洪武永樂年間員增數倍加以
軍國之費所以內外倉廩空虛帑藏匱竭一遇兵荒動
至賣官鬻爵而措之無方矣且國家貢賦有限皆小民
膏脂供彼無功之庸輩月計不足歲計有餘則天下生
靈豈有不困而府庫之財豈有不竭者哉本部屢嘗上
請乞退此等冗官人等以省財用俱未蒙俞允亦有留

中未出者且古者官以待有功賞以酬有勞有功者斯授以官有勞者斯加其賞今各官不過由一藝小能無大功勞叨授官職妄費錢糧無益於事是亦弊政之一端也仰惟皇上敦行大孝善繼善述其於先帝良法美意獨不能遵而行之乎伏望皇上下奮乾綱俯從羣議將額外傳陞及乞恩所陞官員及中書處習字人數除勲戚并進藥有效書寫制勅及大臣并經筵講讀官子孫外其餘通行裁革閒住或止許冠帶榮身隨藝供事

仍乞今後凡有代替乞恩傳奉陞官之人斷之以義不
徇以請自以塞倖門而戒奔競庶名器不濫而國用少
足矣弘治十四年五月初二日具題

暫且停止奉送神像以蘇民困事

查得近該御用監太監王瑞等奏稱欽蒙差往湖廣江
西等處公幹合用黃快船六十隻帶去官舍勇士人匠
八十六員名乞要應付等因奉聖旨是欽此欽遵抄出
除照例應付外及詢討船之人俱言往武當山送玄帝

神像近又該司禮監太監陳寬傳奉聖旨朕弟汝王之國凡一應合行的事該衙門便照例開具來說欽此除欽遵施行外近又該巡按直隸監察御史丘天佑奏稱直隸池州府貴池等縣地方五月十一日起十三日止驟雨連綿山水汎漲勢約三丈渰死男婦二百六十一名口漂流居民房屋一千九百餘間臣又聞河南山東南北直隸遼東山西自七月以來天降驟雨平地水深數尺漫倒城垣沒渰田禾自通州直抵湖廣江河兩岸

無處不被水災而河南黃河之水為害尤甚各處秋田
必無所收況今陝西外夷在套勢甚猖獗未見剿平勞
及三省民不聊生而遼東敵人亦未寧靜湖貴苗夷倡
亂方且用兵此正天下多事之秋也仰惟皇上奉送玄
帝神像於武當山固是為國為民祈福之意而神亦以
好生憫物為心臣昔巡按湖廣親詣本山看得宮殿雄
麗神像尊嚴此皆我太宗文皇帝所造其制度規模無
以復加矣皇上若欲奉送神像使時年豐稔邊方無事

不甚勞傷且猶不可况今天下水旱蟲蝗邊方用兵親王之國民困財竭之際而乃有此舉甚非所宜恐神亦不安福亦不降矣欽命內臣并帶去官員匠役如此之多所過去處該用人夫動輒數千差去官員因為安靜終是勞傷况自京城至於通州道路泥濘人馬難行尤為不便臣累荷列聖莫大之恩叨官五十餘年幸蒙皇上委任隆重職掌兵戎官居保傅責在輔弼使天下之人竊議當此多事之秋而為此可已之事誠恐後世史

必書之臣若不懇切為皇上言之是孤眷遇之恩勉留之意則臣負國之罪將何所逭哉伏望皇上憫念生靈察臣愚忠將前神像暫且停送俟年時豐稔邊方寧靜民困少蘇之日差官送去亦不為晚倘納臣言宗社幸甚天下幸甚臣干冒神嚴不勝戰慄恐懼之至為此具本親齋謹題請旨弘治十四年閏七月十六日題

豫防邊患以保重地事

臣竊聞事貴早圖患當豫防易曰履霜堅冰至書曰制

治於未亂此皆防患於未然圖事於未萌也凡事固然
邊患尤甚故昔魯侯征徐戎之亂吉甫伐獫狁之侵莫
不先事而慮內修而外攘也載諸書史昭然可徵切照
甘涼地方乃古外夷左賢王之地漢武帝傾海內之財
勞數十萬之衆方克取之設立酒泉張掖等郡以斷匈
奴之右臂蓋北有勁敵為隣南則番戎所處若不分而
離之使彼此相合不下數十餘萬而中國何以當之則
甘涼地方誠為西北之重地也漢唐之末終不能守而

趙宋全未能得至我朝復入職方設立都司屯聚重兵故我太宗文皇帝深謀遠慮首命內臣總兵以鎮守其地邊境晏然無事干戈後至正統初年敵人多爾濟巴勒等為患數年靖遠伯王驥定西侯蔣貴始克平之迨至天順年間敵人博羅摩囉歡等侵犯此地朝廷命將出師未能剿平既而寧夏副總兵仇廉前去截殺兵過蘭州迤北輕率寡謀被寇所誘數萬人馬喪亡過半自後寇賊入於河套侵擾陝西而甘涼地方稍為寧靜近自

成化二十年以來此寇知彼將不得人生畜蕃息復往彼處侵擾者又數年矣不入則已入則必得厚利而去所在生畜搶掠殆盡而人口擄出者不可勝計官軍失事被其降調者亦難悉數况先因進貢等項各該衛所罷困已極所以敵人知我虛弱益肆猖獗而侵擾之心未嘗少已且陝西路通甘涼止有蘭州浮橋一道若敵以數千人拒守河橋糧運不能通援兵不能進不數年而甘涼之地難保無虞萬一甘涼失守則關中亦難保

其不危近日本院節准兵部咨文該甘涼等處鎮守總兵等官具奏敵人入境或五六十騎或一二百人其所
在各城堡官軍所報不曰追至某處路遠天晚恐墮賊
計掣兵回還必曰用箭射死敵人數多俱被鈎拖去訖
未嘗見其奏有挫衄賊鋒斬獲賊級數多者止是陝西
靖邊衛官軍斬獲敵人首級三十七顆而人民被其虜
掠者亦不知其幾何況邇因甘涼等處闕糧陝西臨鞏
二府人民已經僭運數次困苦不勝近該巡撫甘涼都

御史羅明差來奏事舍人石玘臣等詢問說稱成化二十三年十二月二十三日敵人自涼州直抵陝西蘭州一帶入境搶掠四五日得去頭畜人口不知其數今甘涼總兵等官奏稱止被敵人搶去夜不收馬五匹且前項敵人連年搶掠每得厚利邊將畏懼罪責往往務惟隱蔽誠恐此敵窺知我邊糧闕兵寡即日天氣炎熱遠遁窮荒固覺無事但恐秋高馬肥弓勁之日糾合別種部落擁衆入寇我邊無備不無又遭蹂躪年復一年彼

敵益為得志而甘涼之地大有可憂思預防不可不慮如蒙乞勅兵部計議甘涼各城見有馬步官軍若干若敵人擁衆犯邊有無足穀調用如或兵數不足預調何處客兵前去截殺雖曰延綏調兵三千往來不常久駐則虛費糧草頻回則徒勞士馬遇敵入寇緩不及事如何為宜及行彼處總兵等官計議敵若擁衆侵犯用何方畧挫其初來之鋒設何奇謀遏其深入之勢敵若據守河橋援兵從何而進糧運從何而通方畧早定人

馬豫集務使此寇大遭挫衄不敢犯我邊方用紓朝廷
西顧之憂永絕邊陲侵掠之患明白具奏期於必行仍
乞勅戶部查算甘涼各城見在糧草若干可穀彼處軍
馬幾年支用如調客兵有無闕乏如或不足作何措置
使糧草有數年之積不致臨時有闕乏之虞若再令腹
裏人民僨運千里饋糧民有飢色樵蘇後爨師無宿飽
皆兵家所忌况陝西之民瘡痍未復尤非所宜前項二
事先時計慮猶恐為遲若臨時方籌不無誤事事之大

有可憂者無過於此故我皇明祖訓有曰夷戎與西北
邊境互相密邇累世戰征必選將練兵時謹備之者正
慮此耳臣等叨任大臣濫總風紀苟有所聞事關地方
不敢緘默緣係預防邊患以保重地事理未敢擅便謹
題請旨弘治元年四月二十九日具題

端肅奏議卷九

欽定四庫全書

端肅奏議卷十

明 馬文升 撰

賑恤饑民以固邦本事

仰惟我太祖高皇帝所存者仁民之心所發者恤民之政凡遇水旱災傷百姓闕食必蠲免稅糧復加賑濟雖豐收之年猶度倉廩有餘去處量為減免是以民皆家給人足而無凍餒之憂列聖相承率循是道近年以來

工役頻興科差繁重加以北敵犯邊遠供軍餉財匱力竭而民始有不得其所者矣今歲夏秋大雨驟降連綿旬餘順天并直隸保定河間真定順德永平等府直隸淮安等府徐邳宿等州山東兗州等州曹縣等縣河南開封等府所屬州縣田禾被水滄沒及有蟲蝗猛風之災秋無所收民多闕食臣每詢前項去處闕食人民流移滿道十室九空攜男帶女鬻賣易食啼號奔走絡繹不絕臣思當此隆冬之時衣食無依棲之無所死於道

路填於溝壑有傷和氣深可憐憫見在者又被有司追徵錢糧愈加逼迫或以素乏倉糧不能賑濟況至明年夏收尚有半年之期將何度日又聞盜賊去冬殺死沛縣知縣今秋殺死邳州判官民窮盜起理勢自然而徐邳之間自古奸雄之徒多起於此恐釀成地方之患尤有大可憂者且小民豐收之年出賦稅以供朝廷今當闕食之際豈可不加賑恤以施恩惠乎况前此每遇水旱災傷去處必差官賑濟今歲大水蟲蝗之災尤甚於

前時賑恤之典必須舉行臣叨任大臣銓衡固所職掌
民瘼尤所當言伏望皇上以邦本為重以民饑為憂乞
勅該部或奏差老成大臣或選差能幹屬官分往前項
被災去處會同各該巡撫官員取勘闕食人戶見數將
所在豫備倉糧驗口賑濟如無倉糧或動支官錢或設
法處置凡百從宜而行事重當奏者具奏定奪務使見
在饑民不致凍餓而死逃移之數各要招撫復業仍通
行各該巡撫官員各行所屬凡遇別處流移饑民一體

存恤賑濟毋分彼此若有盜賊生發亦要督捕盡絕毋致滋蔓其有見今該追拖欠稅糧馬草買辦物料等項不急之徵明白具奏暫且停止以蘇困憊差去官員候明年夏田收成之後方許回京庶幾民蒙賑恤之恩而邦本固矣謹題請旨弘治十四年十一月十六日題

申明舊章以厚風化事

洪惟我太祖高皇帝膺天眷命奄有萬方君臨天下慨彼前元紀綱淪替彝尊傾頹斟酌損益聿新一代之制

作大洗百年之陋習始著大明令以教之於先續定大明律以齊之於後製大誥三編以告諭臣民復編禮儀定式等書以頒示天下即孔子所謂道之以德齊之以禮道之以政齊之以刑之意也當時名分以正教化以明尊卑貴賤各有等差無敢僭越真可以遠追三代之盛而非漢唐宋之所能及矣迨我太宗文皇帝克平內難正位宸極及至列聖相承一遵成憲恪守舊章禮儀不紊法令嚴明人尚節儉不事奢靡至景泰年間祖宗

成憲所司奉行未至風俗漸移近年以來羣小用事恣肆奸欺販賣寶石之徒竊盜府庫銀兩供帳服飾擬於王者飲食房屋勝於公侯以致京城之內遞相倣尤習以成風雖嘗禁約玩法不遵軍民之家潛用渾金織成衣服寶石鑲成首飾僧道俱着紵絲綾羅指揮亦用麒麟繡補其官員相遇尊卑不分俱不迴避娼優隸卒騎坐驢馬亦不讓道違禮僭分無所忌憚名分踰越風俗奢侈舊章廢墜禮制因循未有甚於此時者也仰惟皇

上嗣登寶位任賢去邪納諫容言宵衣旰食親決萬機
圖治之心可謂切矣然圖治莫先於法祖書曰監於先
王成憲其永無愆詩曰不愆不忘率由舊章是也然法
祖必先於遵舊章而守成憲舊章成憲莫重於大誥三
編大明律令禮儀定式稽古定制教民榜諸書并節年
禁約條例若不通行申明使人遵守而欲風俗之厚亦
難矣如蒙乞勅禮部將前項書內所載摘其緊要者並
節年禁約條例奏請出榜通行申明曉諭禁約上下各

循禮制用度務存儉約但有前項奢僭之徒在京本院
行令巡城御史督令五城兵馬及錦衣衛坐城官校在
外行巡按御史按察司各緝拿問罪重加懲治違禁衣
服首飾等物入官婦人有犯罪坐家長夫男及通行兩
京各衙門大小官員知會凡在道往來相遇之間各要
緊守禮制當迴避者迴避當讓道者讓道各守尊卑之
分共敦禮義之風仍通行浙江等布政司及應天順天
二府各將大明律大誥三編教民榜禮儀定式稽古定

制諸書並節年禁約條例照依發去榜文事理各要遵守不許故違儒學生員並社學子弟亦須熟讀講解勿視虛文務使中外臣民皆知貴賤有章豐殺有度等級名分不許違越車服田宅莫敢僭踰庶禮讓興而奢靡息矣緣係申明舊章以厚風化事理未敢擅便謹題請旨弘治元年月日具題

陳情衰老乞恩休致事

竊念臣一介寒微叨登甲第歷官中外五十二年恭事

皇上一十五載荷蒙聖明委任隆重眷遇稠疊誠千百載之奇逢也恩實同於天地勞無補於涓埃仰沐保全幸無過舉雖隕首糜軀何足為報但臣氣體素弱宿有疝氣頭暈之疾茲者前後九上封章懇乞休致俱未蒙俞允臣感恩圖報死而後已但臣今年已七十有七耳目益加昏聩精神愈覺衰弱牙齒漸落手足不仁動履艱辛出入朝叅率由勉強勞心之久輒為暈眩委的不能任事有妨重任伏望皇上憫臣衰老曾効微勞放歸

田里少延殘喘以終餘年臣不勝感戴天恩之至為此具本奏聞伏候勅旨弘治十五年八月初三日奏

因災變思患豫防以保固南都事

查得該南京太常寺卿楊一清奏稱弘治十五年七月初三日猛風急雨震蕩掀播樹木拔仆屋瓦飄飛人心驚惶勢甚可畏天地山川社稷等壇并孝陵太廟共吹倒松栢等樹數千餘株及皇城各門內府監局京城內外城門關隘處所并文武大小衙門牆垣屋宇亦於是

日被風雨滲零震撼損塌數多牌樓之傾倒旗竿之摧折不知幾處加以江潮洶湧江東諸門浩如陂湖水漫進城五尺有餘新江口等處江淮濟川等衛戰巡馬船商民船隻多有漂沒及溺死之人詢之父老皆以為耳目所聞見風雨之變未有甚於此者及該欽差守備鳳陽地方內官監太監倪文亦奏七月初三日午時被猛風刮倒皇陵皇城萬歲山園丘方丘獨山龍興寺并南山一應壇壝大小樹木大約不下萬株軍民房屋一千

五百餘間各具奏前來該禮部奏准合無行移兩京大小衙門各行所屬洗心滌慮痛加修省凡天下急務得以盡言無隱等因備咨到部除痛加修省外臣切惟南京鳳陽乃祖宗根本重地皇陵孝陵實仁祖淳皇帝太祖高皇帝藏體之山太廟乃祖宗神主奉安之所與夫天地山川社稷等壇皆國家重事所係非輕今風雨猛驟將各處百十餘年樹株吹倒如此之多而江水洶湧損壞戰快船隻溺死軍民人口如此之衆皆併見於中

都南京是蓋天怒之甚誠非常之災變也伏惟陛下覽此災變亦必有以悚惕於聖心矣然上天垂戒譴告之切夫豈有意者哉思患豫防誠今日之急務也禮部奏奉明詔羣工言之已詳臣恐猶有所未及者焉竊以國家之事在外者言之所大可慮者一則邊敵之猖獗一則南都之無備且邊敵雖強四肢之疾密邇神京兵馬咸聚設有侵犯尚可支持况戰守之備素亦講圖但南京雖江山險固為帝王之州而論建都之地以此為次

者以其居長江之下流也。仰惟我太祖高皇帝即位之
初，始欲建都於汴梁。隨又建都於鳳陽。終復遷都於金
陵。雖知居於下流，乃於湖廣地方設立三十六衛所。官
軍二十餘萬。并江西沿江又多設衛所。控禦上游。以為
金陵之屏蔽。及於江西九江府設立九江衛。經屬南京
前軍都督府。以為蜀楚之喉襟。建置立法。至為詳密。彼
時京儲俱係各省民運赴京。官軍專備戰守。所以三十
餘年安如磐石。迨我太宗文皇帝遷都北平。意固有在。

但南京各衛所官軍分帶一半隨駕前來江南糧米後
令官軍漕運以備京儲該用官軍一十二萬而南京并
湖廣江西沿江衛所官軍已掣其十之五六矣加以逃
亡事故埋沒者不知幾何以致上游無備屏蔽不固而
九江以下直抵南京城池缺人守把教場無軍操練倉
廩空虛衛所狼狽既缺傳報烽火之墩臺又無飛哨巡
邏之船隻江賊出沒劫殺官商鹽徒縱橫操持軍器南
京相去京師二千餘里隔涉大江城池寬曠武備不足

此腹心之患萬一不逞之徒哨聚之輩長艘巨艦順風而下倉卒之間何以禦防晉宋齊梁都於金陵者俱有故事言之至此實可寒心臣任兵部尚書之時每常慮此奏准於九江衛添設副使一員專一整飭自九江直抵南京沿江一帶衛所兵備以防不虞尋被言者革去誠非遠慮也且天下之兵備可有可無而九江之兵備決不可無緣今江西盜賊滋蔓擒捕不絕湖湘軍民因羸瘡痍未復風俗人心比之洪武永樂年間大有不同

窺伺覬覦者安知無之况患生於忽禍起於微乎如蒙
乞勅南京內外守備大臣痛加修身之誠毋負留鑰之
任各營軍馬時加操練京城門禁嚴為隄防坍塌城池
作急修築損壞船隻早為措備凡防奸禦侮之事用心
經畫從長議處重大者具奏定奪仍乞勅吏部推舉頗
諳韜畧素有風力官一員陞任副使江西按察司帶俸
請勅前去九江衛居住上自湖廣接界下至建陽衛一
帶衛所俱聽提調專一整搦軍馬修理城池督造軍器

整點民快擒捕盜賊禁革奸弊及查理沿江驛遞巡司紅馬站船巡邏官兵或軍伍之不足甲仗之缺少與凡有益地方防守之事宜從計處停當徑自具奏定奪其沿江有司官員事有當稟行者俱要稟行不許視非統屬輒為怠玩凡事仍與守備軍職協同計議而行不宜偏執誤事務使威武奮揚戰守有備潛消奸宄之邪謀用為南都之保障仍聽南京內外守備官并南京都察院巡江都御史節制及請勅湖廣江西鎮巡等官各將

未獲盜賊督捕盡絕困苦軍民存恤得所一體整飭軍馬撫安人民以備不虞毋為因循致悞地方臣叨任大臣同國休戚聞茲變異若不披瀝為陛下言之他日倘悞大事則臣負國之罪將何以逭伏乞陛下留神省覽斷自宸衷俯賜施行宗社幸甚生靈幸甚臣干冒天威不勝戰慄恐懼之至緣係陳言災異事理未敢擅便謹題請旨弘治十五年八月二十日題

作養人材以備任使事

切惟人君莫先於致理致理必本於人材人材尤貴乎
作養亦必須作養於先方可任用於後得其材則政舉而
天下治非其材則政墮而天下危此必然之理而治天
下之急務也仰惟太祖高皇帝奄有天下之初法古為
治首先開科取士一以經術為本最重進士之科而於
京官尤加意焉何則後日內而卿相正郎等官外而方
面府正俱於此等官員內陞用故于諸司職掌吏部各
司所載內一欵凡在京官初入仕且令試職一年後考

覈堪用者與實授不堪者量材調用係祖宗舊制亦造就作養人材之一端所當遵守而不可易者也不知何年一向廢墜不曾舉行所以在京進士等項除授官員之後不肯用心習學政事考究古今涵養德性端正心術以致識見未充心胸未廣其於持已或有未至一遇用人輒嘆乏材及至陞擢外任多有不謹不稱任使三年之間罷黜者衆所以陞愈驟而退愈速即今在京各部無五年以上郎中員外郎在外無三年以上布政按

察使日望陞遷怠忽政務治道未隆職此之由此當今之大弊也或者未試職之例久未舉行一旦行之人心嗟怨殊不知洪武年間法度嚴明人材老成猶除試職所以盡心職務庶績咸熙今經百三十餘年紀綱漸弛人心怠玩若不舉行前典重加作興誠恐年復一年人不知警政愈不舉所係非輕及查得南北二京各道監察御史初除者不分進士知縣推官已經任年深俱與試職一年使之習學刑名歷練事體滿日本院考覈堪

用者具奏實授不堪用者仍調除外任所以人皆敬慎
克舉厥職頗為得人惟六部主事大理太常寺評事博
士六科給事中行人中書舍人俱不曾試職就於實授
甚失祖宗作養造就人材以備任用盛意合無自本年
八月大選為始前項各衙門除曾經轉陞及不該陞除
方面知府官員并進士第一甲三名俱不試職外其餘
主事給事中評事中書舍人博士行人初除之時俱照
舊制及御史事例先令試職一年滿日聽本衙門堂上

官六科聽都給事中中書舍人聽掌印官考覈如果勤能不怠老成練達堪用者明白具奏本部再行覈實奏請與實授若輕浮淺露怠惰臣事不堪用者改除外任所除試職官俱懸帶本等牙牌實授三年後一體請給勅命封贈父母妻室庶人材俱蒙其造就任用不至於乏人祖宗舊制亦不至於墜廢而不舉矣臣等職掌選法貴在得人以備任使以隆治道伏乞聖明留意俯賜施行臣等不勝幸甚緣係申明舊制以造就人材事理未

敢擅便謹題請旨

乞恩優容言官事

照得近該南京守備邸國公等官朱輔等會同南京守備內臣奏據南京旗手衛指揮史顯章等呈稱南京工科給事中徐沂倚酒恃醉於長安右門要點官軍將軍人張保兒責打及盤出銅鈴等情備由叅奏前來蒙將徐沂差官提解來京問理隨該給事中徐沂奏稱奉例點閘守禦官軍於西長安門點下不到數多該管官員

誠恐照例叅究捏呈守備官處以致叅奏乞要辯明等因事下所司未經問理覆奏臣等看得南京守備邨國公等官朱輔等奏據指揮史顯章等所呈前項情由則給事中徐沂誠當有罪若據徐沂所奏則點閘守衛官軍亦係職分當為彼此各執一詞是非曲直未見明白其朱輔等任專守備以皇城門禁為重既據所呈法難中止但傳聞徐沂平昔銳意言事勉於盡職頗有中傷之疑其事情虛實臣等未敢懸度切惟朝廷設置言官

所寄最重必須保持愛護庶敢盡其言責若於言官一
有小失不待勘明即加罪譴則各懷患失之心將必以
言為諱凡有大奸大惡誰肯為陛下言之其於治體所
損非細仰惟皇上即位以來未嘗輕易罪一言官所以
各官感激而思欲盡職也伏望皇上軫念言官有益國
家恢宏聖度少霽天威將徐沂曲賜寬宥以釋前疑則
皇上優容言官之量實有同於天地矣臣等干冒天威
不勝戰慄懇悃之至謹題請旨弘治十六年正月初九

日具題

端肅奏議卷十

欽定四庫全書

端肅奏議卷十一

恤民困以固邦本事

明 馬文升 撰

切惟自古聖帝明王英君誼辟莫不以仁民為首務蓋以生民之休戚國家之安危繫焉成周以農事開國以仁愛養民故傳世三十雖有五伯之強而猶知尊周炎漢去古未遠以仁厚育民故歷年四百雖有中衰之禍

而旋復舊物此皆以仁政得民心之深而民仰戴不忘之效也繼而隋唐趙宋其君有始雖勵精圖治躬行節儉而鮮克有終者仁政不能久施於民而又有突厥吐蕃契丹西夏之患兵戈不息民不聊生卒致傾危而不可救此仁政不能久結於民心之驗也載在史冊昭然可攷下迨前元政教凌替風俗既壞綱紀漸清固不足言矣仰惟我太祖高皇帝埽除前元奄有天下拳拳以愛民為本懇懇以憂世為念驗田取賦十一而稅凡有

買辦免其徵納未嘗輕斂於民永為定制故民之感恩
淪於肌膚決於骨髓得民之心實有同於三代萬萬年
之國祚蓋已基於此矣列聖相承咸遵是道但自正統
十四年承平日久兵政廢弛浙江葉宗流福建鄧茂七
廣東黃簫養哨聚於南方夷酋也先等侵犯乎京師自
此天下多事而民漸凋憊矣肆惟皇上即位之初崇尚
節儉尤切愛民內府各衙門供用之物俱定有中數雖
光祿寺奉上之物亦蒙御批而取是以節儉之德傳播

天下仁厚之政繼述祖宗近年以來為因敵人犯邊內
府成造軍火器械等項及百工技藝之人添支酒飯所
以內府各衙門派出物料牲口數多况又諛用一倍而
派三四倍者不分會有會無年年派出無有止息該部
依數分派有司照數催徵懼獲稽遲之罪定立均徭之
名有一大縣一年派銀五六千兩者三四千兩者至小
州縣亦派銀數百餘兩而糧草驛站京班皂隸砍柴擡
柴夫役收買備用馬匹該銀不下數百萬兩不在均徭

數內俱係小民膏脂前派者未完後派者復至加以宗
藩位多冗官太濫祿俸等項及起運京儲邊糧之外存
收糧米所餘無幾凡百買辦俱係民供其視祖宗之時
大有不同以此小民窮困已極怨聲盈途皇上深居九
重何由得知臣詢之天下至京方面官員并各該鄉官
任於京者皆以買辦頻繁均徭出銀累民為言大戕邦
本實由于茲况今兩廣江西盜賊生發良善受害浙江
湖廣等布政司及應天并南直隸各府州縣俱有水旱

灾傷民多闕食荷蒙皇上欽命憲臣前去巡視及勅巡撫等官用心賑濟愛民之仁無以加矣若節年所派物料不行斟酌蠲免有司懼罪嚴刑追徵是所賑者少而所徵者多欲民之不逃亡胡可得乎蓋自古民安則思治民困則思亂和氣則致祥沴氣則召異此理勢之自然也今徭稅既重灾傷荐臻武備衰弱倉廩空虛盜賊充斥而灾異迭見于此之時若不溥施恩典少蘇困憊誠恐闕食之民奸宄之徒乘隙煽聚處處蠢起卒難撲

減雖有智者不能善其後矣事之可憂莫重於是蓋思
貴預施患在早弭故書曰制治於未亂保邦於未危易
曰君子以思患而預防之實有天下者所當深致慮也
伏望皇上以社稷為重以斯民為念乞勅戶禮兵工四
部各查自弘治元年起至十六年止節次派出浙江等
十三布政司并應天順天二府及南北直隸府州縣一
切買辦物料牲口果品及兵部見追節年虧欠倒失馬
匹草場等項銀兩并成造解京軍器與夫一應物料已

未完數目備查明白徑自具奏一總會同五府各部都
察院通政司大理寺堂上官六科十三道掌科掌道官
從長計議某物料合當蠲免某物料合暫停止某物料
果係急用作何買辦凡可以節財裕民久遠良規議處
停當上請聖裁如此庶恩惠溥施而得仁政之本民困
少蘇而免意外之虞臣叨列六卿之首忝任三孤之職
責在上輔君德下安黎庶永固皇圖安如磐石此心之
存死而後已今聞茲民患若不以古今治亂係民休戚

懇切為皇上言之早為消弭萬一貽患地方則臣負國之罪將何所辭伏乞聖明俯賜施行宗社生靈不勝幸甚緣係蘇民困以固邦本事理未敢擅便謹題請旨弘治十六年十一月初一日具題

傳奉事

准本部咨准禮部咨弘治十八年二月十二日早欽奉聖旨朕方圖新政理樂聞讜言除祖宗成憲定規不可紛更其餘事關軍民利病切於治體但有可行的着各

衙門大小官員悉心開具明白來說禮部知道欽此欽
遵備咨轉行到臣伏覩聖諭此即堯之舍己從人舜之
好問好察禹聞善言則拜成湯從諫弗弗之意也蓋欲
追古帝王克紹祖宗而陋漢唐宋諸君有弗為矣天下
臣民何其幸歟臣惟自古創業之君必立一代制度以
為子孫典則率由持守不使墮墜者國祚必保于悠久
罔克遵承致有廢弛者宗社或至於顛危載在史冊昭
然可攷洪惟我太祖高皇帝膺天眷命掃除前元身經

百戰奄有天下稽古定制斟酌損益首開學校定賦稅恤百姓開屯田修軍政重鹽法禁賊吏設驛傳慎刑獄弭盜賊凡此皆我朝一代盡善盡美之大制度也是以百三十餘年列聖相承率由罔墜世底隆平而治臻熙皞也但自正統十四年以後天下多事民漸凋敝迨今歲久風俗奢靡人心怠玩上下因循惟務苟且所以祖宗舊章成憲奉行未至多致廢弛加以冗官太濫宗室位多賦重役繁官貪吏暴而民愈不勝其困矣是蓋世

道之使然也。若非修舉以復其舊，何以重裕而保無虞？仰惟皇上聰明英武，大度寬仁，總攬乾綱，勵精圖治，數召大臣咨詢化理。此誠大有為之君也。其于修復祖宗之舊制，奮振一時之紀綱，以臻堯舜之治，夫何難哉！惟在聖心一轉移之間耳。臣荷國厚恩五十餘年，濫居六卿之長，叨任三孤之首銓，衡人物，固臣職掌。寅亮天地，亦臣責任。軍民利病，屢嘗敷陳。仰荷聖明，多見采納。茲奉勅旨，廣求讜言。臣有所聞，若不悉心條陳，實有以

負皇上知遇之恩而孤勉留之意也故不揣鄙陋謹以祖宗舊制所當修舉及軍民利害所當興革而有裨治道條成十事上塵聖覽伏乞俯賜施行宗社生靈不勝幸甚為此開坐具本謹題請旨

計開

一汰冗員以節國用

切惟唐虞稽古建官惟百內有百揆四岳外有州牧侯伯庶政惟和萬國咸寧夏商官倍亦克用又至周風氣

漸開人文日著然考其建官亦不過周官所載古人立政不在官職之多惟在得人任用是以政不繁而民不擾嗣是而後歷秦漢隋唐以及宋元中間沿革雖有不同而官職之增未至甚繁迨至我朝奄有區夏地廣事殷設官雖盛在京大小衙門官員各有額數內外相維體統不紊故當時事不廢而民不困奈何承平日久政務日繁在京在外添設官員十之三四然此或因錢糧賦稅軍器河道事當專任或因地方學校馬政水利人

貴責成無非上體朝廷下安百姓而其俸祿之給民已不堪令各處宗室已至三十餘府而郡王將軍儀賓不下千餘况各王府大小官員亦談一千五百有奇軍職一至十萬之上其祿米俸隸折色等項豈止數十百萬無非朝廷貢賦之常數天下小民之膏血今在上者蠶食如此之衆則天下之民安得而不困且乏哉查得近年以來儉人白丁專事奔競或假技藝為梯階或以貨賄為蹊徑陸續傳奉乞陞大小官幾至千員通計所食

俸糧動至萬餘石折色隸銀且及數萬兩夫以朝廷有限之財供此庸輩無益之用聖政為之少虧士類因之解體況今敵寇窺邊災異迭見加以各處盜賊生發地方未寧若不預為節省儲蓄萬一倉卒有事軍國之需豈能遽辦本部已嘗二次將冗官當革者上請定奪至今未蒙聖斷伏望皇上以節財為國家之首務以冗官為時政之大弊乞將前後傳奉乞陞人員容臣本部再行條細開具上請斷自宸衷或革去冠帶仍應原役或

姑與職銜住支俸隸其餘無益於事而濫支俸隸者行
令間住天下衙門添設布按二司并府州縣叅政叅議
副使僉事府同知通判州同知縣縣丞主簿等官本部
會同各部都察院大理寺通政司六科十三道掌科掌
道官從長計議酌量裁革庶官不冗濫而財不妄費矣
一育人材以備任使

切惟人君莫先於圖治圖治莫先于育材育材必資于
學校學校者人材之所自出也且一代之材自足一世

之用惟在作養之何如耳若養有素問學必博心術自
端以之修政而政無不舉以之立事而事無不立自無
乏材之歎一代之急務又豈有重于此哉粵昔三代之
時人無不學而所學者窮理正心之要所講者仁義道
德之源所習者修齊治平之道一旦以備公卿大夫百
執事之選則其所行皆此素定其所施張不待閱習而
後能以之赴難則不愛其死隨遇而施皆稱其任所以
人材濟濟而治隆俗美也及周之衰下逮漢唐雖有大

賢名儒才負經濟惜乎其道不得大行而治不古若也
天啓皇明我太祖高皇帝平定天下之初修武之餘即
興文教於天下府州縣皆設學校慎選師儒以教育人
材三年開科取士務得明體適用之才博古通今之士
使內外任事有司之官悉由科目出身所以人才輩出
任用不乏至宣德年間學校漸為廢弛正統初大臣建
議於南北直隸并十三布政司各設憲臣一員以專提
調頗為有益奈何近年以來提調官用心作興者固多

虛應故事者亦有况教官多貨殖以營利期考滿以陞
官生員成材者自肯讀書其餘者則苟延度日不知性
理為何物經濟為何事比得歲貢年已五十又因邊方
多警許其納銀地方荒歉許其納粟俱得入監既為監
生再不務學此大壞人才之一端况各年上銀納粟監
生本部聽選者尚有數千餘名雖年少舉人歲貢監生
亦與彼挨次歷事上選之後又待十數年方得選用闕
少人多取選未到精神漸衰銳氣已無此淹滯人才之

大弊也惟成材生員倖得入科偶合程度即為中式既仕之後安於小成而無仕優則學之功識見未廣經濟少充所以本部每於推舉京堂并方面官之際常以得人為艱且今之人才惟藉進士舉人三年之間除為守令者不過二百餘人固可資其安養黎庶其餘俱係年老并納粟之輩欲望赤心報國而福澤蒼生豈可得乎蓋人才盛衰國家之治亂安危繫焉必須申明振作方可得其真才如蒙乞勅諒部轉行浙江等十三布政司

并南北直隸提調學校御史副使等官各嚴督所屬府
州縣學教官各將本管廩增生員教以性理之學養其
心術之正仍通行嚴加考選果係成材累經科舉年未
五十者增廣生能作經書義資質俊秀堪為後日之用
者俱存留在學教養廩膳五十以上不能科舉增廣四
十以上不通文義者宜遵勅諭內事理量為處置使人
才不至于久淹教養不視為故事仍密訪各學生員平
昔孝友著聞又不作非為者為一等雖不善於作文而

謹禮法者為二等造冊在官則善者知所勸不善者知所懲而自過日遷于善矣是亦三代教養人才之一端也提督官仍每季于四書本經內每府州縣各出題目務闕性理四書三篇經四篇論策各一道按季預先發去令其作文週而復始不一二年經書題目出之始遍性理既明心術自正如此作養十數年後人才必盛於往昔而庶官不至於乏人矣

一恤百姓以固邦本

切惟自古人君之有天下未嘗不以愛養斯民為首務也蓋民惟邦本本固則邦寧所以供軍國之用者資于彼所以祀饗天地宗廟者資于彼朝廷之上宮閭之內凡百之需無一而不資于彼焉故成周以仁愛養民傳世三十而歷年八百是知民者誠有天下者之所當重也仰惟我太祖高皇帝膺天眷命奄有萬方惓惓以仁愛養民凡遇災傷即免稅糧雖豐收之年度其倉廩有餘之處亦量蠲免地畝稅糧什一而稅凡一應供用果

品牲口顏料等項俱於糧石內免糧買辦未嘗分毫重
科于民視彼成周尤為過之列聖相承咸遵是道所以
人民殷富而天下宴然自成化年來科派不一均徭作
弊水馬驛站之剋害戶口鹽鈔之追徵加以柴薪皂隸
銀兩砍柴擡柴夫役與夫買辦牲口厨料夏秋稅糧馬
草每省一年有用銀一百萬兩者少則七八十萬兩每
年如是所以百姓財匱力竭而日不聊生也一遇荒歉
餓殍盈途盜賊蠭起若不痛加減省大為蘇息誠恐將

來之患有不可救者矣如蒙乞勅戶部將天下買辦并均徭各照地方從長計議書為一定之規行令永為遵守及將洪武年間原報食鹽戶口通行各諉布按二司委自分巡分守並直隸府州各委佐貳官員親詣所屬州縣通吊戶口文冊備查洪武年間原報食鹽戶口數多今消耗數少者着實減去比先戶口數少今殷富戶口數多者量為增添十分貧難下戶免其報口務足原數每三十年一次造報及一應革弊良法宜從舉行以

蘇民困而固邦本仍乞勅禮部行查光祿寺見今收貯
歲用牲口價銀如果數多時值收買比之往年價值果
賤將派去各處原定價銀酌量再去減去若干行令作
急徵收銀兩依限解部轉送光祿寺交收隨時收買應
用不致賒欠于人凡百藥材等項不係上納本色者一
體減價納銀庶供用不誤而民蒙其惠仍乞勅兵部將
民間水馬二站及遞運所馬價鋪陳工食銀兩數目及
合用廩給口糧各學齋夫膳夫俱定為則例通行天下

遵守并將養馬地方或論地免糧或贖丁朋合者備查
節年奏准事例再行斟酌畫為定例務在均平南北兩
便使民不受害而馬無所虧仍乞勅工部今後凡內府
派出買辦木植顏料皮張等項查照往年奏准事例估
計太多者具奏量減其數其成造軍器弓箭弦條通查
在京該庫收貯有餘者量免成造裨襖袴鞋出征軍士
多不闕領亦暫且免派折銀及不係急用之物俱要斟酌
停止庶財不妄費而民困少蘇矣

一清屯田以復舊制

洪惟我太祖高皇帝平定天下之初法古為治首定民田驗畝起科以脩軍國之用次定屯田上納子粒以給軍士之食此我朝一代緊要制度行之萬世而不可廢者也故工部設屯田一司專掌屯軍牛具犁鋤耜齒等項彼時天下衛所軍士邊方去處七分下屯三分守城腹裏去處八分下屯二分守城雖王府護衛軍人亦照例下屯每屯軍一名有撥屯地一百畝者五十畝者或

三二十畝者所收子粒內除一十二石准作本軍月糧
仍納餘糧子粒六石上倉所以各衛所倉廩充實紅腐
相因而軍士無乏糧之虞迨我太宗文皇帝其于屯田
尤為注意創置紅牌事例示以激勸良法冊籍明白無
敢欺隱者不知始自何年屯田政廢冊籍無存上下因
循無官查考以致衛所官旗勢豪軍民侵占盜賣十去
其五六屯田有名無實所以各該衛所軍士月糧有一
二年不得闕支者近因災異該廷臣會議奏准差給事

中御史并戶部官一員請勅前去南北直隸浙江等布政司并兩京會同清查各衛所屯田隨該戶部郎中等官王勒等將清查過在京并在外保定等衛所屯田頃畝及該子粒數目奏行戶部會官計議定奪臣因看得本官所奏清出在京在外衛所屯田被人侵占等頃共四萬一千餘頃該徵子粒四十萬八千餘石中間尚有未能清出者以其未知某衛所係洪武年間舊設某衛所係南京并口外調來一例清查又多委有司官員踏

勸下人作弊以此未得其詳不能清足原額其南京并南直隸江西等處衛所屯田清出者尤少况今軍士月糧累歲不得闕支而歸怨於朝廷勢官豪軍侵占屯田而久享厚利軍士嗟怨人心未平若不再行查冊設法清理則占地之家終為已業而屯田之制終未得復將來無所憑據軍士月糧何從仰給事之所重莫先於此如蒙乞勅該部一面咨行南京戶部於後湖冊庫內檢查洪武永樂洪熙年間屯田黃冊一面行查西京衛所

某係舊衛某係新設某係各處調來某衛所幾分下屯
該地若干頃但係屯田一應事例通查明白仍查先差
官員已行回報未足原額數多者并未經清查去處各
再差官請勅前去設法清查若清出七八分去處不必
差官止請勅巡撫都御史督令都布按三司管屯官員
清查務足原額方許造冊回京戶部候各處清查完日
通行計筭停當仍仰各該衛所備造文冊戶部及都布
按三司并該衛所各收一本仍造黃冊一本齎送南京

戶部轉發後湖官庫如法收貯每十年一次照民冊事例造繳庶使冊籍明白將來有所持循而祖宗舊制不致廢墜矣

一重鹽法以備急用

切惟鹽課者國家之重事民生一日而不可缺者以之備緊急之軍餉以之救凶荒之民命誠有國者之大利濟時之急務也各處鹽課兩淮為急若使法不嚴而利歸于下人必致用不足而患貽于不測所以歷代相因

必重其法仰惟我朝建制之初其於鹽法尤為嚴重行
鹽各有地方販賣不許越境勢要中納者有禁例軍民
私販者有重刑所以鹽法通行無敢沮壞至宣德正統
年間鹽法漸弛朝廷屢命內臣同在京堂上官員前去
清理祛除奸弊懲治豪強使存積鹽課常有數十年之
用或遇緊急用兵缺乏糧餉卒不能至或地方水旱灾
荒軍民缺食乏糧賑濟方纔召商中納糧米賴其飛輓
以備急用上納完足通關激剖就給勘合隨到隨支得

利數倍所以客商樂于中納而緩急得其所濟此我朝
鹽法之定規也自成化年間以來有乞恩求討者有織
造支用加以兩京往來勢要船隻夾帶私鹽數多又况
行鹽地方之不拘私自販賣之無禁雖有中者及至到
邊多不上納糧料止是折收銀兩一遇緊急缺糧復命
大臣前去督理重復勞民買運所以祖宗鹽法壞之極
矣若不通行整理誠恐有誤大事如蒙乞勅戶部通查
鹽法始末舊規并今日廢壞之由徑自處置停當上請

定奪務俾鹽課有餘而緩急得濟法令嚴明而奸弊革除緊急之軍餉不致有誤飢荒之民命賴有所活法定之後永遠遵守凡一應勢要之家權豪之人敢有乞恩沮壞者計六科十三道官指實劾奏皇上斷自宸衷必置于法庶祖宗舊制不至於廢弛軍國重務弗被其沮撓矣

一廣儲蓄以備凶荒

切惟氣數流行不能無水旱之灾思患豫防不可無豫

儲之備蓋有備則無患也故雖堯湯不免水旱而堯湯之民不至甚病者以其有備也仰惟我太祖高皇帝篤意養民其于備荒皆有定制天下州縣悉出官錢糴穀各於四鄉置倉收貯以時斂散雖遇凶荒而民藉以安此萬世之利也歷年既久奸弊日滋豪猾侵漁穀盡倉毀稍遇凶荒民無所賴正統初大臣建議該戶部覆奏選差廉能幹濟京官請勅分往各布政司督同司府等官通行整理修復四倉或出庫藏官錢收買或勸殷富

大戶出納以復祖宗舊制而民實有賴焉奈自正統十四年以後敵寇犯邊天下自此多事而四倉之糧又為之廢弛矣至成化七年憲宗皇帝時勅各該巡撫都御史督令都布按三司官將原設四倉設法積糧三年之內務責成功成化二十年復降勅巡撫官舉行天語叮嚀至為詳悉彼時各官亦仰體聖意用心整理倉糧頗積至成化二十一年河南陝西四川大遭荒旱之灾前積倉糧不能賑濟人民死亡流移者十之四五而四倉

之糧又為之一空矣以後雖有措置之糧多被看倉人等侵盜抵換所存者糠粃穀稻一遇大荒動經差遣大臣往彼賑濟不賣官鬻爵則上納監生吏典所得無幾而軍民存活者少皆由所蓄不多而賑濟不敷也近日淮揚蘇湖浙江乃其明驗况今承平日久生齒日繁頗大州縣人口百餘萬極小州縣亦不下數十餘萬口若非大為儲備遇荒豈能賑濟坐視死亡實所不忍仁政所重莫此為先如蒙乞勅該部查照洪武年間創置四

倉舊制及列聖降勅整理修復之意從長計議作何處置創為久遠洪規使四倉之糧隨其州縣大小人口多寡遇荒足穀賑濟不致失所其餘歛散關防良法美意宜從徑自具奏上請定奪庶儲積有備而遇災無虞矣

一撫流移以正版籍

切惟戶口以版籍為定人民以撫字為先民雖有流移法貴乎招撫若流移者不能招回則見在者日見消耗而軍匠埋沒者多矣我朝洪武初招撫流民俱有定法

彼時人民安業無多逃亡遇有灾荒流移他所者所司即委佐貳官員帶領各里里甲分投前往有收去處尋訪招撫帶領回還重加存恤或給與雞豚或量免稅糧蘇息數年方當差役窩藏流民者有重罰隱占不報者有嚴禁所以流民易於復業而版籍不至於有虧軍匠不致於埋沒此誠安民之良規也迨至宣德正統天順成化年間民困財竭一遇大荒流移過半上司不知行文有司不行招撫任彼居住詭冒附籍南方州縣多增

其里圖北方州縣大減其人戶軍匠消耗率由於此年
遠者卒難得回近逃者尚可招撫若不申明舊制着實
舉行誠恐數十年後逃移稅糧併於見在人戶陪納日
加困苦無以聊生誠非治道之所宜也乞勅戶部通行
陝西山西河南山東北直隸巡撫都御史各行所屬大
小州縣各查自正統元年以至弘治十六年某州縣逃
移人戶共若干曾經招撫復業若干戶一向未曾復業
若干戶及行湖廣四川南直隸巡撫官亦通行所屬州

縣各查某州縣安插某布政司某州縣人戶共若干軍匠民籍若干添設若干里圖各州縣脩造文冊俱繳送巡撫官處咨送北方前項布政司巡撫官即行所屬州縣查對相同委有前項逃移人戶仍各差佐貳官帶領里老甲首前去各該州縣闕取如已生成家業者分房前去承種田地辦納糧差其餘原在彼居住者聽從其便此外別有招撫良法宜從具奏施行如此庶流民復其原業而版籍不至于大虧矣

一革大弊以蘇軍民

照得洪武年間建都金陵一應京儲四方貢獻蜀楚江西兩廣俱順流而下不二三月可至京師福建浙江直隸蘇松等府雖是逆流地方甚邇不一二月可抵皇都北方賦稅止供各邊不勞遠運所以民不受害而得遂厥生迨我太宗文皇帝遷都北平其南京并各處進貢方物數少尙未有馬快船隻之差至宣德正統年間以後或裝載薦新品物及南京所造節籛等項用船數多

所過州縣動撥人夫千百名其夫俱係附近州縣衛所
出辦銀兩僱覓少則用銀十數餘兩多則三五十兩一
年之間自儀真抵通州所用僱夫等項銀不下十數萬
兩俱係小民膏脂而不係賦稅洪武年間裡河軍民未
嘗遭此困苦來京馬快船隻其弊固多而進鮮者其害
為甚且進鮮乃朝廷敬奉祖宗之意固不可闕今所進
鮮物若青梅小竹筍蓮藕苔菜宣州梨蓋因太祖高皇
帝南京踐祚之時所用故猶進奉供薦今京師果品菜

蔬雪梨青杏比之南京所產者其味尤佳隨時供薦亦可將敬又奚待于南京者臣任南京兵部尚書之時備知內府針工局遞年將在南京內官內使所用鋪陳衣服該用絹布俱于在京該庫關出用馬快船裝載差內官或內使管運前去南京織染局染造差去官到彼俱支廩給下程一年該用銀數百餘兩俱係上元等二縣出辦待其染完南京兵部復撥馬快船裝運來京南京內官內使者此中做成衣服鋪陳仍關支絹布復用馬

快船隻一同裝載差官管運前去南京染造交割歲以
為常此裡河軍民受害第一大弊也臣思天下之弊有
大小有遠近若弊之小而近者革之而遠且大者不革
豈能回天意而蘇民困哉况裡河實南北喉襟之地我
朝鴻圖億萬年若革裡河前項馬快船之弊則軍民蒙
億萬年之利若前弊未革則軍民受億萬年之害利害
之間向背所係又况我列聖相承咸以愛養黎元為心
雖皇上篤於大孝以奉祖宗但祖宗在天之靈憫念軍

民困苦亦必為之不憚伏望皇上將臣所言乞勤乙夜之覽斷自宸衷將前項薦新如青梅蓮藕宣州梨苔菜之類于中量免進奉省少船隻其餘揚梅枇杷鮭魚北方不產者照舊進奉供薦其兩京內官內使合用該染布絹每年該局行移該部計筭一年該用若干數俱于南京該庫交收該局每年預先奏行南京該部并南京守備太監再行查算明白照數就于南京該庫支送南京織染局染造完備該南京內官內使者就彼支與應

用免其運來以省勞擾諫在京內官內使所用者守備
太監選差南京老成的當內官管運前來諫局交收定
為常例不許奏擾紛更其餘若馬槽篩簸之類止運竹
木來京着落此間諫衙門匠役編造應用仍乞勅南京
兵部今後差撥馬快船隻務照奏准事例滿船裝載不
許多撥沿途擾人庶馬快船隻減其多差而沿河軍民
免其復害之弊矣

一慎刑獄以重民命

切惟刑者所以禁暴亂防奸宄聖人不得已而用之故
帝舜有欽恤之命周王有敬明之戒我朝列聖相承每
下恤刑之詔而又特遣刑官出外審錄皆所以體天心
而重民命也但律文創自往古其來已遠文義深奧非
用心講讀者未能深曉初任刑官者視以為常蒞官之
後再不講明問囚之際亦少推情止憑原勘情詞間有
失入人死罪在外惟按察司官出自法司頗知律意亦
有忽略而不經心者至於推官理問斷事等官其于律

文猶不能知而問囚豈能皆得其當或有明知冤枉而不與辨明者亦有避嫌而故入重罪者比先年間布政司叅政叅議等官職專承流宣化俱不問理刑名近年以來有諛巡撫巡按官接狀批行問理者有自受詞狀問理者出脫輕罪者固有中間枉人至死者亦多臣每于秋後會同多官審錄在京重囚情可矜疑者仰蒙聖斷發落情有未明奏行再問者仍照原擬非故欲人之死蓋取自安之道其他府州縣正官有等酷暴之徒逞

一己之忿怒輕人命如草芥有犯諛竊盜而即時捶死者有犯諛鬪毆致死而問擬故殺者民之死于非辜者處處有之撫巡者不之禁兩司官若不知小民含冤無所控訴傷天地之和召水旱之災未必不由於此也如蒙乞勅三法司脩載朝廷恤刑之仁憫惜人命之意戒飭司屬務要講明律意必至貫通曉暢凡問重囚叅錯訊鞫期得真情彼此具服方纔擬罪送審審刑官尤宜用心詳讞毋拘于成案勿避其嫌疑使生者無冤而死

者無憾以仰副聖天子恤刑之意仍乞勅都察院轉行各該巡撫巡按官行令按察司并分巡等官凡遇問理重囚一體用心不許輕易致有枉抑今後布政司官不許受詞自問刑名各撫按官亦不許批行問理其分守叅政叅議若有所屬人民有告戶婚由土吏典民害事情許其接狀咨行本司劄仰理問所問理其餘行府問報大小衙門官員各要心存仁恕愛恤小民不許輒肆酷刑致死人命已告發者提問如律未發者指實罷黜

母事姑息縱令殃民庶刑罰不濫而民罔冤抑矣弘治
十八年四月初三日具題

端肅奏議卷十一

欽定四庫全書

端肅奏議卷十二

明 馬文升 撰

追究庸醫用藥非宜明正其罪事

照得弘治十八年四月二十九日該司禮監太監陳寬傳奉大行皇帝聖旨朕偶感風寒欲調理數日暫免視朝該衙門知道欽此臣等連日問安至五月初七日忽聞聖躬升遐臣等五內分崩叫地號天不勝哀痛既而

風聞原命醫人用藥非當之所誤也雖九重深邃莫知其的伏思大行皇帝平昔節膳寡慾善養天和縱感風寒豈宜遽爾至此臣等哀恨尤深且朝廷設置太醫院衙門訪取天下名醫授以大官養以厚祿又設御藥房於內府嚴密之地尤選上等之醫日支酒飯正為調理聖躬之用今臣等風聞之言內外相同臣子之恨何忍遽已伏望殿下早示睿斷薦醫并用藥非宜有誤聖躬官醫人等合行拿送法司追究節次所用藥餌有無當

否擬罪如律上請發落庶上有以紓殿下痛悼之心下
可少釋軍民無窮之恨臣等不勝哀悼之至為此會本
親齋謹具啓聞伏候令旨弘治十八年五月十二日會
本具啓

釐正封贈事

切照我朝諸司職掌內一欸一兩子當封從一高者婦
人因其子封贈而夫子兩有官亦從一高者蓋言一人
生二子俱任官當封其親若長子官五品次子官七品

當從其長子五品者封贈其親是謂兩子當封從一高者其婦人一子任官當封其母而父亦任官若夫之官五品子之官七品當從其夫之官而封贈其母若子之官二品父之官四品五品當從其子之官而封贈其母是謂夫子兩有官亦從一高者此指嫡母而言一代定制開載甚明不知始自何年有父任尚書或侍郎都御史其次室所生子或中進士或由監生等項出身任郎中主事評事太常等寺典簿等官三年考滿稱職該封

贈其生母當依母以子貴隨其已之官品封贈今擬其
從一高者往往將生母從其父之官不分存亡俱封贈
夫人或淑人是以夫貴而封贈其妾非母以子貴受封
之義也不可不為改正切惟致治莫先于倫理倫理莫
先于名分必名分正而後倫理可明前項封贈殊為未
當若不釐正誠恐因襲年久有紊舊制而貽譏後世合
無今後若父任尚書侍郎都御史等官次室所生子或
任郎中主事評事典簿等官三年考滿稱職請給誥勅

談封贈生母者依母以子貴照已之官品封贈不許再行比例從其父之官封贈其母庶舊制不違人心允愜緣係釐正封贈事理未敢擅便謹題請旨弘治十八年九月十四日具題

重明詔信老臣以慎初政事

文選清吏司案呈奉本部送於吏科抄出吏科給事中安奎題近談御用監太監王瑞等題為急闕書篆人員事奉聖旨這急闕書篆人員吏部便訪尋精通的七八

人來看欽此諛吏部題稱自來內府各衙門所用雜流辦事之人俱不經由本部選送宜從本監徑自訪求能書之人應用等因奉聖旨還選取來用欽此續諛吏部考試得吳一中等八名頗通楷書等字乞要轉送御用監收用奉聖旨吳一中等八名并前革退李鼎等六名都送御用監通考優劣來說欽此又諛吏部執奏要將吳一中等八名送去御用監收用李鼎等六名不必同送等因奉欽依還照前旨通送考試來說欽此欽遵仰

惟陛下以英妙之年撫盈成之運渙頒明詔汰黜冗員
一時仕路頓清宿弊盡革中外咸曰此聖天子維新之
美政垂久之良法也夫何旬月之內率多變更且雜流
之徒廉恥素無奔競慣熟謂傳乞固可得官遇裁革即
諛盡黜不若營謀吏部訪取之名可為長久保身之計
致令太監王瑞等題稱書篆闕人誤蒙准令吏部訪尋
并選取來用又將革退李鼎等六名通令送考雖諛部
執奏再三而陛下終未俞允使大臣垂首喪氣謂掣肘

而難行冗食依社憑城卒資緣而得計臣愚以為吏部者朝廷黜陟幽明之司使既退復進則吏部為徒設矣大臣者陛下股肱心膂之寄使論列不行則大臣為備員矣詔旨者朝廷鼓舞羣下之術朝更夕改則詔旨為虛文矣矧詔旨一出布滿寰宇所以洽上下之情者在是所以新天下之耳目者在是故凡繼世之君必頒詔令以繫人心然又必堅如金石信如四時使臣下有所持循而後可以言治否則視為汎常莫之信從不信不

從政事隳廢世道日趨于壞而不可救藥矣陛下初嗣寶位天下延頸想望太平顧可徇左右交通之情進既黜冗濫之徒與詔旨自相背戾哉昔人謂南山可搖而此判不可移陛下忍令詔旨反一判之不若矣臣嘗檢閱冗員未嘗不為之愧赧中間如雙線匠之類亦得傳官其與竈下養中郎將爛羊頭關內侯何殊不意聖明之朝亦容有此如李鼎等亦係招收人匠之數濫叨俸祿已有年矣考其所能不過書篆彈琴一藝之微有之

不足為重無之不足為輕不審何以克稱聖心而有回
天之力如此且吏部遵奉明詔裁革冗濫不下七百餘
員使李鼎等六名姦計得行臣恐倖門一開後即為例
如御藥房欲援引裁革之醫士則曰修和闕人乞要考
選內官監欲援引裁革之人匠則曰造作闕人乞要查
取不知陛下何以處之方今朝政多闕邊事孔殷災異
頻仍府庫空竭陛下自即位以來未見召一大臣訪一
大政顧乃于此不急之務冗濫之徒既責吏部以訪尋

又責吏部以送考使此輩不獨一時苟祿以容身直欲後日名正而言順雖老臣讜言累進不恤也雖詔旨廢閣不行不恤也雖大體有損公論未愜不恤也然天下之事致謹于始猶恐鮮克有終以陛下新政之初謹始之際施為如此其欲終之盡美治之有成也難矣痛惟先帝崩逝今中外人心所賴扶持世道整頓紀綱遵守成憲三四元老大臣而已老成之士朝野著龜即此冗員一事陛下於老臣馬文升之論列尚且置之不信拒之

不從如此不知此外可信從者果何人哉臣聞執狐疑之心來讒賊之口持不斷之意開羣枉之門近日文升執奏前事至於旬日留中不出臣仰測淵衷欲從文升之論則拂左右懇乞之私欲遂左右之私又非大公至正之道以故展轉卒從前旨遲遲而出耳使事事如此將來羣小肆志賄賂公行馴致主威不振于上政柄潛移于下矣新政之累孰大于此况裁革冗員雖係吏部之職掌舉正欺蔽實臣本科之攸司用是不忍緘默為

陛下激切言之伏惟聖明俯納臣言收回成命勅令吏部將李鼎等六名仍遵詔旨革退為民惟復拿送法司追究交通情弊以為將來之戒其吳一中等八名務照吏部所擬必候辦事十年滿日給與冠帶再辦事五年滿日量除鴻臚寺序班仍前辦事不必考滿陞用著為定例以後若有夤緣傳乞陞職者許諛部及臣等指實叅奏庶弊源永塞政體不虧上有以彰聖明納言之美下有以遂老臣報國之心等因具題奉聖旨諛衙門知

道欽此欽遵抄出送司查得近該御用監太監王瑞等題稱儒士李鼎等六名革退為民各不應役即今成造上用生活并寶燾龍旗龍床等項無人書篆乞勅吏部查照先年事例考取精通楷書篆書西番西天等字人員量送六七人赴監辦事等因具題奉聖旨這急闕書篆人員吏部便訪尋精通的七八人來看欽此本部查得李鼎等五名先因御用監招作諸曉楷篆西番西天等字并撫琴隨談工部叅稱李鼎等既謂之舍人固非

在監人匠之屬所習字業又非諛監應有匠色混同招
收不過他日傳奉之媒奏奉孝宗皇帝聖旨改作儒士
御用監辦事甫及三年奏要比照儒士彭勉循事例授
職又諛本部叅稱不應妄引事例合送法司問罪具題
節諛奉孝宗皇帝聖旨准與冠帶欽此及查得趙彥亦
係傳奉之數俱各近奉明詔本部查奏革退為民今御
用監成造上用生活合用楷篆等字人員宜從本監徑
自訪取應用等因具題奉聖旨還選取來用欽此本部

訪得在京官舍等項邢溥等五十七員名各諳曉楷篆等字考得數內吳一中等八名頗通前項字樣及議擬各人俱係白衣出身必候辦事十年給與冠帶又辦事五年量除鴻臚寺序班不必考滿別項陞用等因開坐具題奉欽依還照前旨通送考試來說欽此欽遵覆奏間今該前因案呈到部看得吏科給事中安奎所言大意欲遵明詔以革倖進之徒恤人言以謹傳奉之漸不使李鼎等復得進用而壞維新之政是亦本官職分之

所當為臣等亦竊思之李鼎等不過書篆小藝其先以
匠役招收後又改作諳曉楷篆西天等字已諛工部叅
其為傳奉之媒續要乞授職事又諛本部叅其妄引事
例之罪及今夤緣進用據其前後奔競情節比之其他
一時傳奉陞官者又大有不同臣節執奏非與李鼎等
別有讎怨固欲沮之但以皇上新政之始中外企望之
時今乃因李鼎等五六小人撓亂使明詔不信于下物
議騰沸于朝傳奉又開末流難禁蠹國致災實由于此

關繫治體誠非細故伏乞聖明留神省覽合無俯從諫
官之議仍依臣等所言將李鼎等不必送考照舊為民
其吳一中等八名本部送赴該監收考中者留用不中
者亦從黜退其考中之數月支俸糧及辦事除官等項
月日俱仍依臣等所擬以後若有貪緣陞職者許本部
及科道官指實參奏拏問如此則皇上從諫之美可以
追配祖宗用人之善可以益隆治道冗食自減而倖門
少塞矣緣係重明詔信老臣以慎初政及節奉欽依還

照前旨通送考試來說并諛衙門知道事理未敢擅便
謹題請旨正德元年二月二十六日具題



端肅奏議卷十二